

Supervizor pozdravlja mjere kojima se određuje obvezan pritvor za počinitelje težih krivičnih djela



Supervizor za Brčko dr Raffi Gregorian pozdravlja način na koji je Skupština Distrikta 10. juna 2009. jednoglasno usvojila izmjene Zakona o krivičnom postupku Distrikta kojima se propisuje obvezan pritvor za počinitelje težih krivičnih djela koji su u prvostupanjskom postupku osuđeni na kaznu zatvora. Ove izmjene, koje su objavljene u Službenom glasniku Brčko Distrikta BiH br. 17/09 i koje će uskoro stupiti na snagu, pomažu da se premosti jaz na osnovu kojeg je bilo moguće da počinitelji težih krivičnih djela ostanu na slobodi čak i nakon izricanja osuđujuće presude u prvostupanjskom postupku. Ovo pitanje je na dramatičan način aktuelizirano kada je okorijeli kriminalac, koji je u žalbenom postupku pušten na slobodu, ispalio nekoliko hitaca u policajca Nasveta Čolića. Supervizor je pozvao da se odmah poduzmu mjere kojima bi se u budućnosti spriječila takva dešavanja.

Supervizor je izrazio čvrstu podršku Pravosudnom povjerenstvu Brčko Distrikta i Zakonodavnom povjerenstvu Skupštine za njihovu inicijativu da izmijene članak 138 Zakona o krivičnom postupku Brčko Distrikta. Novom odredbom je propisano da svim pojedincima koji su osuđeni na kaznu zatvora u trajanju od pet i više godina bude određen pritvor, dok se sudovima ostavlja mogućnost da odluče o tome da li će odrediti pritvor za lica koja su osuđena na kaznu zatvora u trajanju od manje od pet godina.

Supervizor je pohvalio zastupnike Distrikta zbog toga što su blagovremeno usvojili neophodne odredbe.

«Distrikt je još jednom pokazao da predvodi ostatak BiH u smislu efektivnih i značajnih reformi. Ova jedinstvena izmjena zakona u BiH predstavlja veliki korak ka unaprijeđenju vladavine prava i čini Distrikt bezbijednijim mjestom za sve njegove građane,» istakao je supervizor. «Počinitelji težih krivičnih djela koji su osuđeni na kaznu zatvora više neće moći da izmiču pravdi ili naude drugima. Pošto ovaj problem postoji širom BiH, nadam se da će entiteti i državni parlamenti razmisliti o tome da usvoje slične odredbe na prostoru na kome imaju nadležnost,» zaključio je supervizor.